


Preparacion di billetenan di Aruba den fase final



ORANJESTAD (AAN)- Sr. Evelino Fingal, diseñador di e billetenan nobo di Aruba, durante un entrevista a splica motibo di su estadia na Haarlem Hulanda ultimamente.

Durante e periodo di 2-siman sr. Evelino Fingal a traha estrechamente cu e imprenta Hulandes, Johan Enschede en Zonen ariba e ultimo fase di ehecuccion di e billetenan nobo di Aruba.

Primeramente mester a ahusta e colornan ariba e offset prints pa despues controla si e colornan ta cuadra cu e margen technico di e diseño original. A inicia cu e billetenan di Afls.50/-.

Na momento cu e ahustacion di colornan a ser aproba segun e margen technico di e diseño original a continua cu e proceso y ariba e offset print a bin un "plaatdruk", numeracion

di e billete y demas detayenan di identificacion monetario, despues e sheetnan cu ta contene 32 billete ariba nan ta ser vernisa. Ta bolbe haci un control si impresion y numeracion ta corecto pa despues corta cada billete for di e sheet y paketa e cantidad rekeri imprimi. Mesun proceso a utiliza pa e billetenan di Afls.100,00, Afls.10,00 y Afls.5.-.

Sr. Evelino Fingal a splica tambe cu e billetenan ta ser imprimi ariba papel cu ta contene un "watermerk". Esaki ta un di e varios seña y contra-señanan di seguridad, cu ta forma parti di seguridad total di e billetenan.

Pa loque ta trata e billetenan di Afls. 25,00, den e simannan

aki a ser poni cla pa worde imprimi, pasando naturalmente via e mesun proceso anteriormente menciona.

E billetenan nobo di Aruba cu a ser diseña desde 1985 pa sr. Evelino Fingal lo ta den circulacion local entrante 1^o Januari 1990.

Ing. R.H. Lacle, Ministro Plenipotenciario di Aruba na Den Haag, Hulanda, durante estadia di sr. Evelino Fingal a pone su mes na altura di e trabao cu tabata ser haci ariba preparacion di e billetenan Arubano den presencia di e hefe di e departamento di "banknotes and stamps" na e imprenta Johan Enschede en Zonen, sr. J.W. Keuen.

(dinsdag 26 september 1989)